

568834

經義考

江
南
天

卷之四

四

五

六

七

八

九

十

十一

十二

卷之四

四

五

六

七

八

九

十

十一

十二

經義考卷一百五十八

秀水 朱彝尊 編

男 昆田 校

禮記 二十一

劉氏 迪簡 皇王大學通旨舉要

一卷

未見

黃虞稷曰書凡十章一章總言三綱領三三十四章釋三綱領注略五章至十章釋八條目注解

江西通志劉迪簡字簡卿安福人吳元年被徵授尚賓館副使洪武建元進皇王大學通旨奉詔使交趾至南甯道卒

劉氏清大學要旨

一卷

未見

傅氏清大學補略

一卷

未見

范氏祝幹大學發微

一卷

佚

劉氏清大學要句

佚

蔣氏允汶大學章旨

佚

王瓚曰温州府學教授永嘉蔣允汶彬夫撰

陳氏

雅言

大學管窺

一卷

未見

張氏

洪

大學解義

一卷

未見

鄭氏

濟

大學正文

一卷

未見

方孝孺後序曰大學出於孔氏至程子而其道始明至朱

子而其義始備然致知格物傳之闕朱子雖嘗補之而讀者猶以不見古人全書爲憾董文清公槐葉丞相夢鼎王文憲公柏皆謂傳未嘗闕特編簡錯亂而考定者失其序遂歸經文知止以下至則近道矣以上四十二字於聽訟吾猶人也之右爲傳第四章以釋致知格物由是大學復爲全書車先生清臣嘗爲書以辨其說之可信太史金華宋公欲取朱子之意補第四章句以授學者而未果浦陽鄭君濟仲辨授學太史公預聞其說而雅善篆書某因請以更定次序書之將刻以示後世蓋聖賢之經傳非一家之書則其說亦非一人之所能盡也千五百年之間講訓言道者迭起至於近代而始定而朱子亦曷嘗斷然以爲至當哉姑亦以待後之君子爾世之曉曉然黨所聞而不

顧理之是非者皆非朱子之意也舊說以聽訟釋本未律以前後之例爲不類合爲一章而觀之與孟子堯舜之知不徧物之言正相發明其爲致知格物之傳何惑焉古人之說經略舉大義而意趣自備非若後世說者之固也由國家而推之天下大學之所宜爲則欲致知者舍聽訟而何以哉是語雖異於朱子然異於朱子而不乖乎道固朱子之所取也歟鄭君濟仲多學而不雜執中而不滯觀其所好其傳所謂近道者歟

徐氏

與老

大學集義

一卷

未見

黃虞稷曰字仲祥錢塘人王達嘗師事之

丁氏璣大學疑義

一卷

佚

李氏果大學明解

一卷

未見

黃虞稷曰成安人景泰庚午舉人歷官濟南知府

楊氏守陳大學私抄

一卷

未見

守陳自序曰蒙少受大學輒併其章句誦而味之佐以或問參以諸說已自謂通矣及誦之久味之詳乃反有疑焉

其後誦益久味益詳疑亦從而益繁積數十載雖與天下
友反覆講之疑終不釋也今家居無事日誦味之而疑如
故乃取所疑經傳易而置之各錄章句於其下而章句有
與今易置之文義不合者亦僭用己說以蒙謂別之而其
所以易置之故則詳具於各章之末旣而誦且味之怡然
理順乃淨抄成帙閱之篋中不敢以示人一日客或翻篋
見之閱未半輒嘻笑且怒罵曰吾不意子之叛儒先而紊
聖經至此也夫大學者孔子之經曾子之傳而朱子之章
句或問後學惟誦習之莫敢違也何乃僭易而妄解之亟
焚之毋貽是書累也愚應之曰非敢爾也王魯齋曰天下
所不易者理也二程不以漢儒不疑而不敢更定朱子不
以二程已定而不敢復改亦各求其義之至善而全其心

之所安非強爲異而苟爲同也今蒙所抄縱未得乎義之至善亦足全吾心之所安若其謬說只自謬耳是書豈被其累譬如蜀之八陣石一時或亂之而千載如故也虞之五瑞玉一臣或失之而萬國自如也子安庸怒哉客頽頽而去余甚慚且悔然業已抄之不忍毀也用識之篇末

丘氏

澹

大學衍義補

一百六十卷

又補前書一卷

存

神宗御製序曰朕惟帝王之學有體有用自仲尼作大學一經曾子分釋其義以爲十傳其綱明德新民止至善其目格致誠正修齊治平闡堯舜禹湯文武之正傳立萬世帝王天德王道之標準宋儒真德秀因爲大學衍義掇取

經傳子史之言以實之顧所衍者止於格致誠正修齊而
治平猶闕逮我孝宗敬皇帝時大學士丘濬乃繼續引伸
廣取未備爲大學衍義補揭治國平天下新民之要以收
明德之功采古今嘉言善行之遺以發經傳之指而後體
用具備成真氏之完書爲孔曾之羽翼有功於大學不淺
是以孝廟嘉其考據精詳論述該博有補政治特命刊而
播之朕踐祚以來稽古正學經史諸書博涉殆徧因念真
氏衍義我聖祖大書於廡壁累朝列聖置之經筵肅宗聽
講之餘賦翼學詩以紀之朕爰命儒臣日以進講更數寒
暑至於終篇然欲因體究用而此書尤補衍義之闕朕將
細繹玩味見諸施行上遡祖宗聖學之源源且欲俾天下
家踰戶曉用臻治平昭示朕明德新民圖治之意爰命重

梓以廣其傳而爲之序如此云

濬自序曰臣惟大學一書儒者全體大用之學也原於一人之心該夫萬事之理而關係夫億兆人民之生其本在乎身也其則在乎家也其功用極於天下之大也聖人立之以爲教人君本之以爲治士子業之以爲學而用以輔君是蓋六經之總要萬世之大典二帝三王以來傳心經世之遺法也孔子承帝王之傳以開百世儒教之宗其所以立教垂世之道爲文二百有五言凡夫上下古今百千萬年所以爲教爲學爲治之道皆不外乎是曾子親受其教旣總述其言又分釋其義以爲大學一篇漢人雜之禮記中至宋河南程顥兄弟始表章之新安朱熹爲之章句或問建安真德秀又剝取經傳子史之言以填實之各因

其言以推廣其義名曰大學衍義獻之時君以端出治之本以立爲治之則將以垂之後世以爲君天下者之律令格式也然其所衍者止於格物致知誠意正心修身齊家蓋卽人君所切近者而言欲其舉此而措之於國天下耳臣竊以謂儒者之學有體有用體雖本乎一理用則散於萬事要必析之極其精而不亂然後合之盡其大而無餘是以大學之教旣舉其綱領之大復列其條目之詳而其條目之中又各有條理節目焉其序不可亂其功不可闕闕其一功則少其一事欠其一節而不足以成其用之大而體之爲體亦有所不全矣然用之所以爲大者非合眾小又豈能以成之哉是以大也者小之積也譬則網焉網固不止於一目然一目或解則網有不張譬則室焉室固

不止於一槩然一槩或虧則室有不具此臣之所以不揆
愚陋竊倣眞氏所衍之義而於齊家之下又補以治國平
天下之要也其爲目凡十有二曰正朝廷曰正百官曰固
邦本曰制國用曰明禮樂曰秩祭祀曰興教化曰備規制
曰慎刑憲曰嚴武備曰馭夷狄曰成功化先其本而後末
由乎內以達外而終歸於聖神功化之極所以兼本末合
內外以成夫全體大用之極功也眞氏前書本之身家以
達之天下臣爲此編則又將以致夫治平之效以收夫格
致誠正修齊之功因其所餘而推廣之補其略以成其全
故題其書曰大學衍義補云非敢並駕先賢以犯不韙之
罪也臣嘗讀眞氏之序有曰爲人君者不可以不知大學
爲人臣者不可以不知大學而繼之以爲人君而不知大

學無以盡正君之法是蓋就其本體而言耳若卽其功用而究竟君臣之所當知者則固有在也粵有古昔聖賢爲學之道帝王爲治之序皆必先知而後行知之必明其義行之必舉其要是知欲行其要者必先知其義苟不知其義之所在安能得其要而行之哉故臣之此編始而學之則爲格物致知之方終而行之則爲治國平天下之要宮闕高深不出殿廷而得以知夫邑里邊鄙之情狀艸澤幽遐不履城闌而得以知夫朝廷官府之政治非獨舉其要資出治者以御世撫民之具亦所以明其義廣正君者以輔世澤民之術譬之醫書其前編則黃帝之素問越人之難經後編則張仲景金匱之論孫思邈千金之方一方可以療一證隨其方以已其疾惟所用之何如也前書主於

理而此則主乎事真氏所述者雖皆前言往行而實專主於啟發當代之君亦猶孔孟告魯衛齊梁之君而因以垂後世之訓臣之此編較之前書文雖不類意則貫通第文兼雅俗事雜儒吏其意蓋主於眾人易曉而今日可行所引之事頗多重復所修之辭不能雅馴弗暇計也臣遠方下士叨官禁近當先皇帝在御之日開經筵卽綴班行之末親覩儒臣以真氏之書進講陛下毓德青宮又見宮臣之執經者日以是書進焉臣於是時蓋已有志於是旣而出教太學暇日因採六經諸史百氏之闕也繕寫適完而陛下嗣登大寶蓋若有待言者臣學不足以適用文不足以達意偶因所見而妄有所陳區區一得之愚固無足取而惓惓一念之忠儻爲聖明所不棄焉未必無少補於初

政之萬一臣謹序

何喬新志墓曰公以西山真氏大學衍義有資治道而治國平天下之事闕焉乃採經傳子史有及於治國平天下者附以己見作大學衍義補今天子嗣位之初公書適成乃表上之上覽之甚喜批答有曰卿所纂書考據精詳論述該博有補政治朕甚嘉之賜白金二十兩紵絲二表褻陞公尙書且命錄其副付書坊刊行

程氏 敏政 大學重定本

一卷

存

敏政跋曰大學章句朱子所訂且爲格致傳補亡有大惠於後學朱子旣沒矩堂董氏槐始謂格致傳未亡乃雜於